

LIBRO A PANGIWANWAN ITI

KAAMAAN

LIBRO A PANGIWANWAN ITI

KAAMAAN

Impablaak ti
Ti Simbaan ni Jesucristo dagiti Santo iti Ud-udina nga Aldaw
Siudad ti Salt Lake, Utah

© 2001 ti Intellectual Reserve, Inc.
Nailatang amin a karbengan
Naimaldit iti Estados Unidos ti America

Pannakaanamongna iti Ingles: 3/01
Pannakaanamongna a maipatarus: 3/01

Pannakaipatarus ti *Family Guidebook*
Ilokano

Dagiti Linaonna

“Ti Kaamaan: Maysa a Waragawag iti Lubong”	iv
Pannakabukel ken Panggep ti Kaamaan	1
Panangisuro iti Ebanghelio iti Pagtaengan	5
Dagiti Kangrunaan a Pagrebbengan ti Kinasaserdote	15
Panagsanay iti Panangidaulo	19
Ti Kaamaan a kas maysa a Yunit ti Simbaan	20
Dagiti Ordinansa ken Bendision ti Kinasaserdote	22
Pananggun-od kadagiti Material ti Simbaan ken Panagsapul iti Impormasion iti Pakasaritaan ti Kaamaan	31

Pannakaiwaras

Ti *Libro a Pangiwawanwan iti Kaamaan* ket agpaay iti amin a kameng, kangrunaanna kadagiti kabarbaro a napasurot wenno awan unay padasna iti Simbaan. Daytoy ti mangbalabala iti panggep ken pannakabukel ti kaamaan ken aglaon daytoy iti pakaammo maipapan no kasano ti panangisuro iti ebanghelio iti kaamaan, no kasano a maipatungpal dagiti pagrebbengan ti kaamaan, no kasano nga agbalin a yunit ti Simbaan ti kaamaan, ken no kasano ti panangannong kadagiti ordinansa ken mangted kadagiti bendision ti kinasaserdote.

“Ti Kaamaan: Maysa a Waragawag iti Lubong”

Idi 1995, nangiwarnak ti Umuna a Panguluen ken ti korum dagiti Sangapulo-ket-dua nga Apostol iti “Ti Kaamaan: Maysa a Waragawag iti Lubong.” Daytoy a waragawag ket panangipakdaar ken panangpasingked kadagiti doktrina ken kannawidan nga inulit-ulit a dinakamat dagiti propeta iti unos ti pakasaritaan ti Simbaan. Naglaon daytog kadagiti pagbatayan a napateg unay iti pagragsakan ken pagimbagan ti tunggal kaamaan. Nasken nga adalen dagiti kameng ti kaamaan ti waragawag ken nasken nga agbiagda babaen dagiti annuroten daytoy.

“Dakami, ti Umuna a Panguluen ken ti Konseho dagiti Sangapulo-ket-dua nga Apostol ti Ti Simbaan ni Jesucristo dagiti Santo iti Ud-udina nga Aldaw, sipapasnekkami a mangiwaragawag a ti kallaysa iti nagbaetan ti maysa a lalaki ken maysa a babai ket inordenan ti Dios ken ti kaamaan ti sentro ti plano ti Namarsua para iti agnanayon a pagtungpalan dagiti annak.

“Amin a tattao—lalaki ken babai—ket naparsua a kalanglanga ti Dios. Tunggal maysa ket maipatpateg nga espiritu nga anak a lalaki wenno babai dagiti nailangitan a nagannak, ket, iti kasta, tunggal maysa ket adaan iti nadosan a kababalin ken pagtungpalan. Ti seks (pagilasinan no lalaki wenno babai) ket maysa a kangrunaan a talugading ti kinatao ken panggep ti tao sakbay ti yaayna iti daga, iti kaaddana iti daga ken ti agnanayon.

Iti pagarian sakbay ti yaay iti daga, ammo ken nagdaydayaw iti Dios dagiti espiritu nga annak a lalaki ken babai a kas Agnanayon nga Amada ken inawatda ti planona a pakagunodan dagiti annakna iti nagtagilasag a bagi ken pakaaddaanda iti padas iti

daga tapno dumur-as nga agturong iti kinaan-anay ket iti kamaudiananna maragpatda ti nadosan a pagtungpalanda a kas agtawid iti agnanayon a biag. Ti nadosan a plano ti kinaragsak ti mangpabalin kadagiti pagnaigan ti kaamaan nga agtalinaed iti labes ti tanem. Dagiti sagrado nga ordinansa ken katulagan a magun-od kadagiti nasantuan a templo ti mangpabalin para kadagiti tao tapno makasubli iti sidong ti Dios ken para kadagiti kaamaan tapno agkaykaysa iti agnanayon.

“Ti umuna a bilin nga inted ti Dios kada Adan ken Eva ket maipapan iti kabaelanda nga agbalin a nagannak a kas agassawa. Ipaakdaarmi a ti bilin ti Dios para kadagiti annak nga agpadda ken punnuenda ti daga ket sitatolinaed a bilin. Ipaakdaarmi pay nga imbilin ti Dios a dagiti sagrado a panakabalin ti panagparsua ket maaramat laeng iti nagbaetan ti lalaki ken babai, mayannurot iti linteg a nagkallaysa a kas agassawa.

“Ipaakdaarmi a ti wagas a nakaparsuaan ti mortal a biag ket nadosan a naisaad. Pasingkedanmi ti kinasagrado ti biag ken ti kinapategna iti agnanayon a plano ti Dios.

“Addaan dagiti agassawa iti napasnek a pagrebbengan a mangipateg ken mangaywan iti tunggal maysa ken dagiti annakda. ‘Dagiti anak ti pagpatawid ni Jehova [Apo]’ (Dagiti Salmo 127:3). Addaan dagiti nagannak iti sagrado a pagrebbengan a mangpatanor kadagiti annakda iti ayat ken kinalinteg, mangted kadakuada kadagiti pisikal ken naespirituan a kasapulanda, mangisuro kadakuada a mangipateg ken agserbi iti tunggal maysa, agtungpal kadagiti bilin ti Dios ken agbalin a managtungpal iti linteg a makipagili sadino man ti pagnaedanda. Dagiti agassawa—inna ken amma—ti agsungbatto iti sango ti Dios para iti pannakatungpal dagitoy a pagrebbengan.

“Inordenan ti Dios ti kaamaan. Ti panagkallaysa iti nagbaetan ti lalaki ken babai ket napateg unay iti agnanayon a planona. Karbengan dagiti ubbing ti mayanak kadagiti begkes ti kallaysa, ken tapno padakkelen ti maysa nga ama ken maysa nga ina a mangdayaw kadagiti kari iti kallaysa nga addaan iti naan-anay a kinapudno. Magun-od ti ragsak ti biag ti kaamaan no nabangon daytoy kadagiti pannursuro ni Apo Jesucristo. Naipasdek ken napagtalinaed dagiti naballigian a kallaysa ken kaamaan kadagiti pagbatayan ti pammati, kararag, panagbabawi, pammakawan, respeto, ayat, panangngaasi, aramid, ken makaay-ayo nga aramiden iti panagaliwaksay. Babaen ti nadosan a plano, dagiti amma ti mangidaulo

kadagiti kaamaanda iti ayat ken kinalinteg ken pagrebbenganda ti mangted kadagiti kasapulan ti biag ken pannakasaluad dagiti kaamaanda. Kangrunaan a pagrebbengan dagiti inna ti mangpadakkel kadagiti annakda. Kadagitoy sagrado a pagrebbengan, obligasion dagiti amma ken inna nga agtinnulong ti tunggal maysa a kas agkadua nga agpada (ti karbengan ken pagrebbenganda). Ti pannakabaldado, pannakatay, wenna dadduma pay a kasasaad ket mabalin nga agkasapulan ti individual a pannakaibagay. Nasken a tumulong dagiti kabagian a kameng ti kaamaan no kasapulan.

“Iballaagmi a dagiti tattao a mangsalungasing kadagiti katulagan iti kinalalus ti dayaw, dagiti mangabuso iti asawa wenna anak, wenna dagiti mapay a mangaramid kadagiti pagrebbengan iti kaamaan, nga iti maysa nga aldaw agtakderdanto nga agsungbat iti sango ti Dios. Iballaagmi pay a ti pannakarakrak ti kaamaan ket mangisangbay kadagiti tao, komunidad, ken pagilian kadagiti didigra a kas impadto dagiti nagkauna ken kabaruanan a propeta.

“Awaganmi dagiti agrebbeng nga umili ken opisial ti gobierno iti tunggal disso nga itandudoda dagiti pagrukodan a naisangrat a mapagtalinaed ken mapapigsa iti kaamaan a kas kangrunaan a yunit ti kagimongan” (*Ensign* Nob. 1995, 102).

Pannakabukel ken Panggep ti Kaamaan



Pannakabukel

Ti kaamaan ti kangrunaan a yunit ti Ti Simbaan ni Jesucristo dagiti Santo iti Ud-udina nga Aldaw ken ti kapatagan a yunit ti gimong iti panawen ken agnanayon. Binangon ti Dios dagiti kaamaan tapno mangyeg ragsak kadagiti annakna, mangpalugod ka-



dakuada a mangadal kadagiti umno a pagbatayan iti naayat nga aglawlaw, ken mangisagana kadakuada para iti agnanayon a biag.

Ti pagtaengan ti kasayaatan a lugar a pangisuruan, pagadalan, ken pangyaramatan kadagiti pagbatayan ti ebanghelio. Ditoy ti pagsursuruan dagiti tao a mangipaay iti taraon, aruaten, pagkamangan, ken dadduma pay a banag a kasapulanda. Nasken a tumulong ti ama ken ina, kas agpada nga agkadua, iti tunggal kameng ti kaamaan nga:

- Agkalikagum a manggun-od iti kinapudno ken mangpadur-as iti pammati iti Dios.
- Agbabawi kadagiti basol, agpabuniag para iti pannakaugas dagiti

basol, agbalin a kameng ti
Ti Simbaan ni Jesucristo dagiti
Santo iti Ud-udina nga Aldaw,
ken umawat iti Espiritu Santo.

- Agtungpal kadagiti bilin ti Dios, agadal a sipapasnek kadagiti nasantuan a kasuratan, mangidaton iti bukod a kararag iti inaldaw, ken agserbi kadagiti dadduma.



- Mangibinglay iti ebanghelio kadagiti dadduma.



- Matalugadingan ken makikallaysa iti templo iti maikari a katakunaynay para iti agnanayon, mangbuanngay iti naragsak a pagtaengan para iti kaamaan, ken mangtulong iti kaamaan babaen ti ayat ken pangsakripisio.

- Agsukisok iti pakaammo maipapan kadagiti pimmusayen a kapuonan ken mangannong kadagiti ordinansa ti templo para kadakuada.
- Mangted iti taraon a kasapulan para iti salun-at ti espiritu, panna-kilangan, bagi, ken rikna.

Ti ama nga addaan iti kinasaserdote ket maysa a kangrunaan a dadaulo ti kinasaserdote iti Simbaan. Isu ti pangulo wenno patriarka ti kaamaan (kitaen ti Taga-Efeso 5:23). Kas dadaulo ti kinasaserdote iti kaamaanna, isu ti mangidaulo iti kaamaan ken pagrebbenganna ti mangisuro, mangbendision, ken mangted kadagiti kasapulan ti biag para iti kaamaan. Idauluanna ti kaamaanna iti panagsaganada nga agsubli iti sidong ti Nailangitan nga Amatayo. Ti asawana ti kapatgan a katakunaynay, kadua, ken mamagbagana. Nasken a pagsaritaan dagiti agassawa dagiti amin a banag a pakaseknan iti kaamaan ken pagtaengan.

Nasken nga ipaay ti ama dagiti naespirituan a kasapulan ti kaamaanna. Nasken a penkenna a masuruanda iti ebanghelio ni Jesucristo ken nasken nga aramidenna ti amin a kabaelanna a mangpapigsa iti pakinakemda ken mangtulong kadakuada nga agtungpal kadagiti bilin ti Apo.

Mabalin ti maysa a maikari ken adda kabaelanna nga ama iti Simbaan a maaddaan iti kinasaserdote, a daytoy ti bileg ken turay tapno agakem iti nagan ti Dios. Babaen daytoy a bileg

ken turay, agbalin ti ama a dadaulo ti kaamaanna. Mabendisionan ti maysa nga ama nga addaan iti kinasaserdote dagiti kameng ti kaamaanna ken maitedna dagiti naespirituan a kasapulanda. Babaen ti turay ti mayannatup a kinasaserdote ken *addaan iti pammalubos manipud iti dadaulona iti kinasaserdote*, mabalin ti ama ti:

1. Mangnagan ken mangbendision kadagiti anak.
2. Mangbuniag kadagiti anak (ken dagiti dadduma).
3. Mangpatalged kadagiti anak (ken dagiti dadduma) a kameng ti Simbaan ken mangitalek kadakuada iti Espiritu Santo.
4. Mangitalek iti kinasaserdote kadagiti annakna a lallaki (ken dadduma) ken mangorden kadakuada kadagiti saad iti kinasaserdote.
5. Mangbendision ken mangiwaras iti sakramento.
6. Mangidaton kadagiti tanem.

Awanan iti pammalubos manipud iti dadaulona iti kinasaserdote, mabalin ti maysa nga ama nga addaan iti Kinasaserdote a Melchizedek nga ikkan-pategna ti lana ken bendisionanna dagiti kameng ti kaamaanna ken dagiti dadduma no masakitda ken mangted kadakuada iti naisangsangayan a bendision kadagiti dadduma a panawen no dumteng ti panagkasapulan. (Kitaen kadagiti panid 22–30 iti daytoy libro a pangiwawan para kadagiti pangiturong

iti panangannong kadagiti ordinansa ken bendision ti kinasaserdote.)

Nasken a penken ti ama nga aktibo a makiraman ti kaamaanna iti tallo a kangrunaan a pagrebengan ti kinasaserdote:

1. Naespirituan ken naindagaan a kinasamanagsagana a bukod ken sangakaamaan.
2. Panangibinglay iti ebanghelio.
3. Pakasaritaan ti kaamaan ken dagiti ordinansa ti templo nga agpaay kadagiti sibibiag ken dagiti natay.

Addaan ti ina iti bendision a mangipasngay ken mangpadakkel kadagiti anak. Isu ti agpada a kadua ken magbaga iti asawana. Tulonganna daytoy a mangisuro kadagiti annakda kadagiti paglintegan ti Dios. No awan ti ama iti pagtaengan, ti ina ti agrebeng para iti kaamaan.

Nasken nga agkaykaysa iti panggep ti ama ken ina. Panggepda koma a tun-oyen ti mangisagana iti amin a kameng ti kaamaan tapno makapagsubli iti Nailangitan nga Amatayo. Nasken nga agkaykaysada bayat ti panagtinnulongda a mangragpat iti daytoy panggep a tun-oyen. Binangon ti Apo ti Simbaan tapno matulongan dagiti amma ken inna a mangisuro ken mangaywan kadagiti kaamaanda.

No dumteng dagiti anak iti kaamaan, nasken nga ipateg ida dagiti nagannak, isuroda kadakuada dagiti kinapudno ti ebanghelio, ken agba-

linda a pagwadan ti nalinteg a panagbiag. Nasken nga adalen ken tungpalen dagiti annak dagiti bilin ti Dios. Nasken a dayawen ken tungpalenda dagiti nagannak kadakuada.

Agpannuray ti pigs a ti Simbaan kadagiti kaamaan ken tattao nga agtungtungpal iti ebanghelio ni Jesucristo. Agpannuray unay ti panangnanam ti kaamaan kadagiti bendision ti ebanghelio iti no kasano ti panangawat ken panangaramid ti ama ken ti ina kadagiti kangrunaan a pagrebbengan kas nagannak. Saan iti kaano man a panggepen ti Simbaan a mangted kadagiti programa wenno pagrebbengan kadagiti amma ken inna a mangrimbaw wenno mangu-pay kadakuada wenno mangigapu kadakuada a mangliway kadagitoy kangrunaan unay a pagrebbenganda.

Panggep

Gapu ta ay-ayatennatayo ti Nailangitan nga Amatayo, tarigagayanna a maitan-oktayo a kas Kenkuana. Tapno matulongantayo,

nangted kadatayo iti maysa a plano a suroten a maibatay kadagiti nadosan a paglintegan ti kinapudno. Dagiti mangadal maipapan iti plano ken mangsurot iti daytoy a sipupudno ket makapagbalindanto iti maysa nga aldaw a kas iti Amatayo iti Langit ken nanamenda ti kita ti biag a nananamenna.

Paset ti plano ti panangpanawtayo iti langit ken yaaytayo iti daga. Ditoy gun-odentayo ti nainlasagan a bagi, agsursurotayo babaen dagiti padas, ken paneknekantayo iti bagbagitayo a maikaritayo a makipagnaed manen iti sidong ti Dios. Paneknekantayo ti bagbagitayo a maikari babaen ti nawaya a panagpili tapno agtungpal kadagiti paglinteganna. (Kitaen ti Abraham 3:23–25; 2 Nephi 2:27.)

Tapno matulongantayo a mangisagana iti bagbagitayo para iti panagbiag a kadua ti Apo, binukelnatayo a kaamaan ti Nailangitan nga Ama. Maipada dagiti kaamaan iti daga kadagiti kaamaan a mabalin a magunodtayo iti celestial a pagarian.

Panangisuro iti Ebanghelio iti Pagtaengan



Binilin ti Apo dagiti nagannak nga isuroda ti ebanghelio kadagiti anakda. Kinunana:

“Ket manen, no la ketdi adda anak dagiti nagannak iti Zion, wenno iti sadino man nga istaka a nabangon, a dida isuro nga umawat iti doktrina ti panagbabawi, pammati ken ni Cristo nga Anak ti sibibiag a Dios, ken iti panagbuniag ken ti sagut ti Espiritu Santo babaen ti panangipatay kadagiti dakulap, no walon ti tawenna, dagiti nagannak ti pakaipabaklayan ti basol.

“Ta daytoyto ti paglintegan kadagiti agindeg iti Zion, wenno iti ania man kadagiti istakana a nabangon.

“Ket mabuniaganto dagiti anakda para iti pannakaugas dagiti basolda no agtawendan iti walo, ket awatenda ti pannakaipatay dagiti dakulap.

“Ken isurodanto met dagiti anakda nga agkararag, ken magna a sililinteg iti imatang ti Apo” (DkK 68:25–28).

Panagadal ti Kaamaan iti Nasantuan a Kasuratan



Makapagbalintayo a kas iti Nailangitan nga Amatayo ken mananamtayo laeng ti kita ti biag a nannanamenna babaen ti panangtungpal kadagiti paglintegan a nakaibatayan dayta a bendision (kitaen ti DkK 130:20–21). Sakbay a makapagbiagtayo babaen kadagidiay a paglintegan, nasken a maammuantayo no ania dagidiay. “Saana mabalin a maisalakan ti tao iti kinakuneng” (DkK 131:6).

Ni Jesucristo ti dadaulotayo ken mangmangted iti paglintegan. Ammona ti wagas ken dagiti paglintegan a nasken a tungpalentayo, ken inawisna ti tunggal maysa kadatayo a surotentayo Isuna. Kinunana, “Siak ti dalan, ti kinapudno, ken ti biag: awan ti tao a makaumay iti Ama, no di babaen kaniak” (Juan 14:6). Tapno makapagbalin a kas iti Nailangitan nga Amatayo ken makapagsubli Kenkuana, nasken nga adalentayo dagiti pannursuro ni Jesus ken tungpalentayo dagitoy. Addaantayo kadagiti nasantuan a kasuratan a tumulong kadatayo a mangsursuro maipapan iti biag, pannursuro, ken bilbilin ni Jesucristo.

Dagiti uppat a libro nga ar-aramaten ti Simbaan a kas nasantuan a kasuratan ket ti Biblia, ti Libro ni Mormon, ti Doktrina ken Katulagan, ken ti Perlas a Kapatgan. Dagitoy ti mangilawlawag kadagiti paglintegan ti ebanghelio ken dagiti pagrukodan a babaen dagitoy mabalintayo a rukoden ti amin a pampanunot, aramid, ken pannursuro. Dagitoy ti mangtu-

long kadatayo a mangadal maipapan iti biag ken dagiti pannursuro ni Jesucristo ken mangted iti pagwadan dagiti tao a naaddaan iti pammati iti Dios ken nagtungpal kadagiti bilinna.

Insuro ni Jesus kadatayo a sukisoken ken adalentayo dagiti nasantuan a kasuratan (kitaen ti Juan 5:39; 3 Nephi 23:1; DkK 88:118.)

Nasken nga agadal a sangkamaysa dagiti kaamaan kadagiti nasantuan a kasuratan iti inaldaw tapno masursuro ken masurotda dagiti pannursuro ti Apo. Nasken nga ummongen a sangkamaysa dagiti amma dagiti kaamaanda iti gagangay nga oras iti tunggal aldaw tapno basaen ken paglilinnawaganda dagiti nasantuan a kasuratan. Nasken a maaddaan ti tunggal kameng ti kaamaan a makabasa iti gundaway nga agbasa manipud kadagiti nasantuan a kasuratan.

Mabalin a mangted ti maysa a kameng ti kaamaan iti kararag sakbay ti panagbasa iti nasantuan a kasuratan ket dawatenna iti Nailangitan nga Ama a bendisionanna ti tunggal maysa tapno maawatanna no ania ti nabasa ken tapno makagun-od iti pammaneknek maipapan iti daytoy. Mabalin dagiti kaamaan ti mangidaton iti kararag ti kaamaan kalpasan ti panagbasa iti nasantuan a kasuratan.

Bayat ti panagbasa ken panangutob dagiti kaamaan kadagiti nasantuan a kasuratan, tarigagayandanto ti agbalin nga ad-adda a kas iti Mangisalakan ken makasarakdanto

iti ad-adu a ragsak ken talna iti panagbiagda.

Dagiti Bukod a Panagkararag ken Sangakaamaan

Nasken a makasursuro ti tunggal maysa kadatayo a makisarita iti Nailangitan nga Amatayo babaen ti panagkararag. Ay-ayatennatayo ket tarigagayanna a makisaotayo Kenkuana. Kayatna nga agyamantayo Kenkuana para kadagiti bendisiontayo ken agkid-dawtayo iti tulong ken pannarabayna. Tulongannatayo no agkiddawtayo. Kaaduan a kararag ti maited a nakadumogtayo ken nakakidemtayo bayat ti panagparintumengtayo, panagtugaw wenno sitakdertayo.

Nasken a laglagipentayo ti uppat a napapateg a pagbatayan no agkararagtayo:

1. Irugitayo dagiti kararagtayo babaen ti pannakisarita iti Nailangitan nga Amatayo: "Amami iti Langit. . ."
2. Agyamantayo iti Amatayo iti Langit para kadagiti banag nga ititedna kadatayo: "Agyamankami Kenka. . ."
3. Dawatentayo Kenkuana ti tulong a kasapulantayo: "Dawatenmi Kenka. . ."
4. Igibustayo ti kararagtayo iti nagan ti Mangisalakan: "Iti nagan ni Jesucristo, amen."

Saan a nasken a maisurot dagiti kararagtayo iti amin nga uppat nga addang, ngem makatulong kadatayo ti pananglaglagiptayo kadagitoy a makasursuro nga agkararag. Nasken a kanayon a rugian ken gibusantayo dagiti kararagtayo babaen ti umuna ken maudi nga addang ngem no ania ti sawentayo iti tengnga ket agpannuray no ania ti mariknatayo a napateg. No dadduma, kayattayo a bubosen ti kaaduan iti kararagtayo iti panagyaman iti Nailangitan nga Amatayo. Kadagiti dadduma a gundaway, kayattayo a bubosen ti kaaduan iti kararagtayo iti panagkiddaw iti tulong.

Dagiti Bukod a Panagkararag



Nasken nga agkararag nga agmaysa ti tunggal tao iti uray mamin-san laeng iti tunggal agsapa ken sardam. Nasken a suruan dagiti nagannak dagiti annakda a mangted iti panagkararagda nga agmaysa apaman a mangrugida nga agsao. Maisuro dagiti nagannak dagiti an-

nakda nga agkararag babaen ti panagparintumeng a kaduada ida ken paulitda kadakuada a saggaysa dagiti binatangog. Iti saan a mabayag kabaellanon dagiti ubbing ti agkararag a bukodda.

Dagiti Panagkararag a Sangakaamaan



Nasken a maaddaan ti tunggal kaaamaan iti inaldaw a panagkararag a sangakaamaan. Agparintumeng a sangkamaysa ti sangakaamaan, ket idaton ti ama ti kararag wenno dawatenna iti maysa a kameng ti kaaamaan nga idatonna daytoy. Nasken a maaddaan ti tunggal maysa iti kanayon a gundaway a mangidaton iti kararag. Mabalin dagiti babassit nga ubbing ti agsisinnublat a tulongan ida dagiti nagannak kadakuada. Ti oras a panagkararag a sangakaamaan ti kasayaatan a gundaway a panangisuro kadagiti ubbing nga agkararag ken panangisuro kadakuada kadagiti pagbatayan a kas iti pammati iti Dios, panagpakumbaba, ken ayat.

Dagiti Naisangsangayan a Kararag



Nasken nga isuro dagiti nagannak dagiti annakda a ti Dios ket kanayon a nakasagana a dumngeg kadagiti kararagda. Mainayon iti kanayon a panagkararagda nga agmaymaysa ken sangakaamaan, makapagkararagda iti ania man nga oras a kasapulanda ti naipangpangruna a tulong wenno kayatda a yebkas dagiti panagyamanda.

Panangbendision iti Taraan

Nasken a penken ti tunggal ama a masursuro dagiti kameng ti kaamaan ti agyaman iti Dios para iti taraonda ken dawatenda Kenkuana a bendisionanna daytoy sakbay a manganda. Nasken a mabatangan ti tunggal tao, agraman dagiti ubbing, nga agkararag iti pammendision. Makatulung ti panangidataon iti kararag para iti pammendision iti taraon kadagiti nagannak ken annak a masursuro nga agbalin a managyaman iti Nailangitan nga Amatayo.

Sardam ti Kaamaan iti Pagtaengan



Nasken a mangangay ti tunggal kaamaan iti sardam ti kaamaan iti pagtaengan iti linawas. Mabalin a buklen ti maysa a tao wenno agassawa ti kaamaan. Mabalin nga iraman daytoy dagiti annak ken dadduma a kabagian. Mabendisionan ti tunggal kaamaan, ania man dagiti kasasaadda, babaen ti panangangay iti sardam ti kaamaan iti pagtaengan.

Pagtaltalinaeden ti Simbaan dagiti sardam ti Lunes a nawaya manipud kadagiti dadduma nga aramid tapno makapagtitipon dagiti kaamaan para iti sardam ti kaamaan iti pagtaengan.

Kinuna ti Umuna a Panguluen: “Ikarimi kadakayo dagiti naindaklan a bendision no surotenyo ti balakad ti Apo ken mangangay iti linawas a sardam ti kaamaan iti pagtaengan. Kanayonmi nga ikarkarag a mawatto dagiti nagannak iti Simbaan ti pagrebbenganda a mangisuro ken mangipakita babaen ti pagwadan dagiti pagbatayan ti ebanghelio kadagiti annakda. Sapay ta bendisionan-nakayo ti Dios tapno agbalin a

napasnek iti daytoy kapatgan a pagrebbengan” (“Message from the First Presidency,” *Family Home Evening Resource Book* [1983], iv).

Kas patriarka ti kaamaanna, ti ama ti mangidaulo. Isu ti mangiturong wenno mangdutok iti kameng ti kaamaan a mangiturong iti sardam ti kaamaan. Isurona ti adalen wenno ipakumitna ti panangisuro iti asawana wenno kadagiti annak a makabalin a mangisuro. Nasken a maaddaan ti tunggal maysa a makabalin iti gundaway a makiraman. Makatulong dagiti in-inaudi nga annak kadagiti wagas a kas iti panangidaulo iti musika, panangdakamat kadagiti nasantuan a kasuratan, panangsungbat kadagiti saludsod, panangiggem kadagiti ladawan, panangibunong kadagiti merienda, ken panagkararag. No awan ti ama, ti ina ti mangimatton.

Sumaganad ti naisingasing a balabala para iti sardam ti kaamaan iti pagtaengan:

- Pangrugi a kanta (ti kaamaan)
- Pangrugi a kararag (ti maysa a kameng ti kaamaan)
- Daniw wenno panagbasa iti nasantuan a kasuratan (ti maysa a kameng ti kaamaan)
- Adalen (ti ama, ina, wenno maysa a nataengan nga anak)
- Aramiden (idauluan ti maysa a kameng ti kaamaan ken makiraman amin a kameng ti kaamaan)

- Panggibus a kanta (ti kaamaan)
- Panggibus a kararag (ti maysa a kameng ti kaamaan)
- Dagiti pagpalamiis wenno merienda

Mabalin nga angayen ti kaamaan ti sardam ti kaamaan iti adu a dadduma pay a wagas. Mabalin a maysa a sardam ti kaamaan iti pagtaengan ti ania man nga aramiden a mamagkaysa iti kaamaan, mangpapigsa iti ayatda iti tunggal maysa, tumulong kadakuada nga umasideg iti Nailangitan nga Ama, ken mangallukoy kadakuada nga agbiag a nalinteg. Iraman dagiti pagarigan dagiti kasta nga aramiden ti panagbasa kadagiti nasantuan a kasuratan, panangilawlawag iti ebanghelio, panangibinglay kadagiti pammaneknek, panangaramid iti maysa a proyekto iti serbisio, panangkanta a sangkamaysa, panagpiknik, panagay-ayam iti ay-ayam ti kaamaan, ken panaguli iti bantay. Iraman ti amin a sardam ti kaamaan ti panagkararag.

Mabalin nga ibatay dagiti adalen ti kaamaan iti sardam ti pagtaengan kadagiti nasantuan a kasuratan; dagiti balikas dagiti propeta iti ud-udina nga aldaw, nangnangruna dagiti bitla iti sapaap a komperensia; ken dagiti bukod a padpadas ken pammaneknek. Nasken a maisentro ti adu nga adalen ti pannakayanak, biag, pannursuro, ken Pannubbot ti Mangisalak. Aglaon dagiti *Pagbatayan ti Ebanghelio, Gospel Fundamentals*, ken dagiti magasin ti

Simbaan kadagiti artikulo ken dadduma pay nga impormasion maipapan iti ad-adu a topiko a mabalin a paset dagiti adalen iti sardam ti kaamaan.

Sumaganad dagiti maisingasing a topiko para iti sardam ti kaamaan:

- Ti plano ti pannakaisalakan
- Ti biag ken dagiti pannursuro ni Jesus
- Panagbabawi
- Kararag
- Panagayuno
- Ti Nainsiriban a Balikas
- Ti pagrukodan ti Apo iti moralidad
- Ti kaipapanan ti sakramento
- Apagkapullo
- Panagyaman
- Kinapudno
- Panagraem para iti Dios ken panagdayaw para kadagiti parsuana
- Panagsagana para iti panagbuniag, pannakaordena iti kinasaserdote, wenno panagkallaysa
- Panagsagana a sumrek iti templo
- Panagbasa kadagiti nasantuan a kasuratan
- Panangngilin a nasantuan iti Aldaw a Panaginana
- Panangpakawan kadagiti dadduma
- Pananggun-od ken panangiburay iti pammaneknek

- Panangibinglay iti ebanghelio kadagiti dadduma
- Panangtipon kadagiti pakasaritaan ti kaamaan
- Pannakaawat ken panangawat iti ipapatay
- Panangrisut kadagiti parikut ti kaamaan
- Panangtarawidwid iti pakaseknan ti kuarta ti kaamaan
- Panagtittinnulong iti aramid ti kaamaan
- Panangipateg ken pannakaay-ayo iti musika

Dagiti Pasken ken Naisangsangayan nga Okasion

Mabalin a kasayaatan a gundaway a panangisuro kadagiti kinapudno ti ebanghelio dagiti pasken ken naisangsangayan nga okasion, kas iti Paskua; Paskua ti Panagungar; ti anibersario ti pannakaisubli ti kinasaserdote; dagiti komperensia; ipapanaw ti maysa a kameng ti kaamaan para iti mision; wenko ti panakayanak, panagbuniag, wenko pannakaordena ti maysa a kameng ti kaamaan.

Ti Apagkapullo ken dagiti Daton

Binlin ti Apo dagiti taona nga agtungpal iti linteg ti apagkapullo ken agbalin a maikari kadagiti naikari a bendision (kitaen ti Malakias 3:8–11).



Maysa a kasayaatan a gundaway para kadagiti nagannak tapno isuroda ti paglintegan ti apagkapullo ken daton ket no agbayadda iti bukodda. Maaringan dagiti annak iti makitada nga ar-aramiden dagiti nagannak kadakuada. Dagiti annak nga umaw-awat iti sustento ket nasken a bayadanda iti apagkapullo daytoy. Mabalin ti tunggal anak a maaddaan iti tallo a bangko: maysa ti para iti apagkapullo, maysa ti para iti mision, ken maysa para iti gastosen a kuarta. Tunggal gundaway nga umawat dagiti annak iti kuarta, nasken a sursuruenda ti mangipan nga umuna iti 10 a porsiento iti bangko para iti apagkapullo, ken sumagma-mano a kantidad iti bangko para iti mision, ken ti matda iti bangko ti para iti gastosen a kuarta.

No agbayad dagiti annak iti apagkapullo, nasken a suruan ida dagiti nagannak a mangsurat iti resibo ti apagkapullo, mangipan iti daytoy iti sobre a kadua ti kuarta, ken mangted

wenno mangipatulod iti sobre iti maysa a kameng iti pagobispuanda wenno ti panguluen ti sangada. Nasken a mangted dagiti kaamaan a saan nga agnanaed iti maysa a purok wenno sanga iti apagkapullo iti naawagan a dadauloda iti kinasaserdote.

Dagiti Panaglilinnawag iti Oras ti Pannangan

Mabalin a nasayaat a gundaway dagiti oras ti pannangan tapno pagsasaritaan ti maipapan iti ebanghelio. Kaay-ayo dagiti babassit nga ubbing ti agdamag ken agsungbat kadagiti saludsod maipapan iti ebanghelio. No saanda nga ammo dagiti sungbat, mabalin ti ama wenno ina ti mangted kadagiti ababa a sungbat ken mangisuro iti ebanghelio. Saan a nasken nga iraman iti amin nga oras ti pannangan ti panaglilinnawag maipapan iti ebanghelio ngem ti panaglilinnawag iti mamindua wenno mamitlo a daras iti maysa a lawas ket makatulong iti kaamaan a mangsursuro iti ebanghelio.

Dagiti Estoria iti Oras ti Pannaturog

Gapu ta kaay-ayo ti kaaduan nga ubbing dagiti estoria iti oras ti pannaturog, mangted dagitoy iti nasayaat a gundaway para iti panangisuro iti ebanghelio babaen ti panangestoria wenno panangbasa kadagiti estoria manipud kadagiti nasantuan a kasuratan, dagiti pablaak ti Simbaan, wenno

dagiti bukod a padas. Mangisuro dagiti estoria maipapan iti kinapudno, panangibinglay, ken kinaasi kadagiti napapateg a pagbatayan ti ebanghelio.

Panagtrabaho a Sangkamaysa



Umadu dagiti gundaway para iti panangisuro iti ebanghelio bayat ti panagtitinnulong dagiti kaamaan iti panagtrabaho iti aglawlaw ti pagtaengan. Kas pagarigan, bayat ti panagdalus iti balay wenno panagtrabaho iti paraangan wenno minuyongan, nasken a naalibtak dagiti nagannak para kadagiti gundaway tapno agsarita maipapan iti ebanghelio. Masansan nga agsaludsod ti maysa nga ubbing. Nasken a kanayon nga adda oras dagiti nagannak tapno mangted kadagiti simple a sungbat. Dagiti komentario a kas iti “Nagagetka. Masinunuok a maay-ayatan ti Nailangitan nga Ama kenka,” wenno “Tangadem dagiti napipintas nga ulep nga inaramid ti Nailangitan nga Ama,” a makaited kadagiti ubbing iti rikna ti panagayaman iti Nailangitan nga Amatayo ken pammatalged a pudno Isuna.

Dagiti Konseho ti Kaamaan



Mabalin dagiti amma ti mangum-mong a sangkamaysa kadagiti kameng ti kaamaan iti konseho ti kaamaan. Mabalin dagiti kaamaan nga aramaten dagitoy a konseho tapno mangituding kadagiti panggep a tun-oyen ti kaamaan, mangrisut kadagiti parikut ti kaamaan, mangilaw-lawag kadagiti pakaseknan ti kuarta, agaramid kadagiti plano, mangtulong ken mangpapigsa iti tunggal maysa, mangiburay iti pammaneknek, ken agkararag para iti tunggal maysa. Mabalin a maangay ti konseho iti oras a kasapulan daytoy. Mabalin dagiti amma ti mangangay iti konseho iti tunggal Domingo wenno mainayon daytoy iti sardam ti kaamaan iti pagtaengan. Napateg para iti panagballigi dagiti konseho ti kaamaan ti panangdayaw iti kapanunotan ken rikna dagiti dadduma.

Dagiti Nalimed a Pannakiuman

Adu nga amma ti nakatakuat a ti masansan, nalimed a pannakiuman iti tunggal anak ket makatulong kadagiti amma nga agbalin a nasinged kadagiti annakda, maparegtada ida,

ken masuruanda ida iti ebanghelio. Mabalin a pormal wenno saan a pormal dagita a pannakiuman ken mabalin a masansan nga aramiden.



Nasken a yebkas ti ama ti pammateg ken panagtalekna iti anak, ken nasken a maaddaan ti anak iti gundaway a mayebkasna ti rikhana maipapan iti ania man a banag, parikut, wenno padas. Nasken a dumngeg a nasayaat ti ama ken awatenna a sipupudno dagiti parikut ken palimed ti anak. Mabalin ti ama ken ti anak ti aggidan nga agkararag. Dagiti parikut a tumpuar iti pannakiuman a pakairamanan dagiti dadduma a kameng ti kaamaan ket mabalin a mapagsasartaan iti sumaruno a sardam ti kaamaan iti pagtaengan.

Dagiti Aramiden ti Kaamaan

Nasken a masansan a planuen ti ama dagiti gundaway tapno agtitinnulong nga agaramid ti sibubukel a kaamaan kadagiti bambanag. Dagiti panagpiknik, panagkamping, proyekto ti kaamaan, trabaho iti pagtaengan ken arubayan, panaglangoy, panaguli iti

bantay, ken panagbuya kadagiti nasa-sayaat a sine ken dadduma pay a paglinglingayan ket sumagmamano laeng kadagiti adu nga aramiden a pagraragsakan a sangkamaysa dagiti kaamaan.

Ti sangakaamaan a kaay-ayoda ti agtrabaho a sangkamaysa ket makarikna

iti dakdakkel nga ayat ken panagtutunos. Nataltallugod a dumngeg dagiti annak kadagiti nagannak kadakuada ken sumurotda iti balakadda no mariknada a nasingedda kadakuada. Nasamsamay pay no kua a makaisuro dagiti nagannak iti ebanghelio.



Dagiti Kangrunaan a Pagrebbengan ti Kinasaserdote



Mision ti Simbaan ti Apo ti tumulong iti amin a tao nga umasideg ken ni Cristo. Makatulong dagiti kaamaan a mangtungpal iti daytoy a mision bayat ti:

1. Panangipaayda iti bukod a naespirituan ken naindagaan a kasapulanda ken tumulongda a maipaay ti kasapulan dagiti dadduma.
2. Panangibinglayda iti ebanghelio kadagiti dadduma.
3. Panangipennekda nga umawat dagiti kameng ti kaamaan kadagiti ordinansa ti templo ken tumulongda a maipaay dagitoy a bendision kadagiti natayan a kapuonanda.

Dagiti Nespirituan ken Naindagaan a Kasapulan

Dagiti Naespirituan a Kasapulan

Naglaon ti napalabas a benneg daytoy a libro a pangiwawan, “Panangisuro iti Ebanghelio iti Pagtaengan,” iti pakammo maipapan no kasano a maipaay dagiti kaamaan dagiti naespirituan a kasapulanda.

Dagiti Naindagaan a Kasapulan

Nasken nga agpannuray dagiti kaamaan iti bukodda a kabaalan tapno makaipaayda para kadagiti bukodda a naindagaan a kasapulan ken makatulongda iti dadduma. Tapno agpan-

nuray iti bukodda a kabaelan, nasken a natallugod nga agrabaho dagiti kameng ti kaamaan. Ti panagtrabaho ket pisikal, mental, ken naespirituan a panagkagumaan. Maysa daytoy a pagtaudan iti balligi, kinaragsak, panangipateg iti bagi, ken panagrangay. Nasken nga agkagumaan dagiti nagannak tapno agbalinda a managpannuray iti bukodda a kabaelan ken nasken nga isuroda dagiti annakda nga agbalin met a kasta. Ti panagpannuray iti bukod a kabaelan ti mangted kadakuada iti kabaelan a makatulong kadagiti agkasapulan.

Dagiti amma ti akinrebbeng a mangipaay kadagiti kasapulan ti biag ken salaknib kadagiti kaamaan. Kangrunaan a rebbengen dagiti inna ti panangtaripato kadagiti annak. Penken dagiti nagannak nga addaan ti kaamaan iti nadalus a pagtaengan, nasayaat a taraon, kawes, panangtaripato iti salun-at ken ngipen, dagiti gundaway iti panagadal, panagsursuro a mangtarawidwid kadagiti pamataudan iti kuarta, ken, no mabalin, panagsanay iti no kasano ti agmula iti sumagmamano kadagiti bukodda a taraon. Nasken a suruan dagiti nagannak dagiti annakda a mangisagana iti taraonda ken no kasano ti mangtaginayon iti daytoy para iti masakbayan.

Nasken a sitatallugod nga agrabaho a nasayaat dagiti nagannak tapno maiipaay dagitoy a naindagaan a kasapulan. "Ket diyo ipalubos nga agbisin wenno aglamulamo dagiti annakyo" (Mosiah 4:14). Nasken nga agplano

ken agsagana dagiti nagannak a mangipaay kadagiti kasapulan ti kaamaan iti panawen ti sakit, didigra, kaawan ti trabaho, wenno dadduma pay a pagrigatan. No adda pakarikutan ti ama iti panangipaay kadagiti naindagaan a kasapulan ti kaamaanna ken no saan a makatulong dagiti dadduma a kameng ti kaamaan, mabalinna ti dumawat iti tulong babaen dagiti dadaulona iti kinasaserdote.

Makatulong dagiti annak a mangipaay kadagiti kasapulan nga agpaay iti bagi dagiti kaamaanda babaen ti panangtulongda kadagiti nagannak kadakuada kadagiti trabahoda, panagadal a nasayaat iti eskuela, ken panangaywan kadagiti kawesda ken dadduma pay a tagikua, panangpatalinaed kadagiti bagida ken dagiti pagtaenganda a nadalus ken nadalimanek, ken panangpatalinaed iti nasayaat a salun-at.

Nasken a padur-asen dagiti kameng ti kaamaan ti kabaelanda nga agbasa, agsurat, ken agkuenta, ken nasken nga alaenda ti tunggal gundaway tapno makagun-od iti adal ken mangpadur-as kadagiti kabaelan. Nasken a tungpalenda ti Nainsiriban a Balikas ken manganda kadagiti makapasalun-at a taraon. Kadagiti lugar a mabalin, nasken nga agurnong dagiti kaamaan iti kasapulan nga agpaay iti maysa a tawen, wenno agingga a mabalin, dagiti napapateg a banag a kasapulan a pangsustento iti biag. Nasken a liklikan dagiti kameng ti kaamaan ti awan kaes-eskanna a panagutang, agurnongda para iti masakbayan, ipaayda ti amin nga

obligasionda, ken aramatenda a nasayaat dagiti pamataudanda, a liklikanda ti panagbusbos iti awan kaes-eskana.

Nasken a suruan dagiti nagannak dagiti annakda a mangibinglay kadagiti sabali. Dumani makaited ti amin iti maysa a banag, kasano man ti kabassit ti adda kadakuada. Ti maysa a wagas a pakatulungan kadagiti agkasapulan ket babaen ti panagayuno iti binulan ken panangted iti daton iti panagayuno a maaramat a pangtaraon kadagiti mabisin, pangikamang kadagiti awanan iti pagtaengan, pangkawes kadagiti lamulamo, ken pangsaranay kadagiti masakit. Ipakitatayo ti panagayattayo iti Apo no tumulongtayo kadagiti dadduma. Kinunana, “Gapu ta inaramidyo iti maysa kadagitoy kanunumoan kadagitoy kakabsat, inaramidyo met kaniak” (Mateo 25:40).

Panangibinglay iti Ebanghelio



Insuro ti Apo babaen dagiti propetana iti ud-udina nga aldaw nga addaan ti tunggal kameng ti Simbaan iti pagrebbengan a mangibinglay iti ebanghelio kadagiti sabali. “Umno a

ballaagan ti tunggal tao a naballaaganen ti padana a tao” (DkK 88:81). Ni Alma a maysa a propeta iti Libro ni Mormon inlawlawagna a no mabuniagantayo nasken a sitatallugodtayo nga “agtakder a saksi ti Dios iti amin a kanito ken iti amin a banag, ken iti amin a lugar” (Mosiah 18:9).

Nasken nga aramiden dagiti kameng ti kaamaan ti amin a kabaelanda tapno matulonganda dagiti kabagian, gagayyem, ken kaarubada a makasursuro maipapan iti ebanghelio ni Jesucristo ken dagiti bendision a maisangbay daytoy iti biagda. Babaen ti panangibinglay iti ebanghelio, mapapigsa dagiti nagannak ken annak dagiti bukodda a pammaneknek ken makaisangbayda kadagiti bendision ti ebanghelio kadagiti dadduma. Mabalín dagiti kaamaan ti:

- Agbalin a nasayaat a pagwadan babaen ti panagtungpal kadagiti amin a bilin (kitaen ti Mateo 5:16).
- Agbalin a managymaman iti panagkamengda iti Simbaan (kitaen ti Taga-Roma 1:16), ken ipakaammoda kadagiti dadduma a tao a kamengda.
- Agdamag kadagiti am-ammoda no tarigagayanda a maammuan ti adadu pay maipapan iti Simbaan.
- Agdawat iti Apo a tulonganna ida a mangpili iti kaamaan wenno tao a nakasagana a dumngeng iti ebanghelio.
- Mangyam-ammo iti kaamaan wenno tao iti Simbaan iti sumag-

mamano a wagas, kas iti panangawis kadakuada iti sardam ti kaamaan iti pagtaengan wenno iti tariptonng wenno aramiden iti Simbaan, panangted kadakuada iti libro wenno polieto ti Simbaan a basaen, wenno pannakisarita kadakuada maipapan kadagiti bendision ti ebanghelio.

- Mangawis iti kaamaan wenno tao iti pagtaenganda tapno suruan ida dagiti misionario.

Pagrebengan dagiti nagannak tapno isagana ti bagbagida ken dagiti annakda tapno agserbi iti naan-anay a mision. Tapno maisagana dagiti annak, nangnangruna dagiti annak a lallaki, masapul nga isuro dagiti nagannak ti ebanghelio iti pagtaengan, maaddaan iti bukod ken sangakamaan a panagbasa iti nasantuan a kasuratan ken panagkararag, ken masansan a pagsasaritaan maipanggep ti pagrebengan ken parabur iti panangibinglay iti ebanghelio. Masuruanda dagiti annakda nga agurnong iti kuarta para iti mision, agtrabahaya a naimbag, agpannuray iti bukodda a kabaellan, ken agayat ken agserbida iti dadduma a tao.

Dagiti Ordinansa ti Templo para kadagiti Sibibiag ken Natay

Kadagiti templo, awaten dagiti mai-kari a kameng ti Simbaan dagiti sagrado nga ordinansa ken sumrekda iti katulagan iti Dios. Makiramanda pay



iti panangannong iti ordinansa para kadagiti pimmusayen a kapuonanda. Kadagiti lugar a mabalin, nasken a makagun-od ti tunggal ama ken ina iti rekomenda ti templo manipud kadagiti dadauloda iti kinasaserdote ken mapanda iti templo tapno umawat iti bukodda nga ordinansa iti templo. No saanda a makapan iti templo, nasken nga agbiagda a mai-kari iti rekomenda ti templo.

Addaan dagiti kaamaan iti sagrado a pagrebengan a mangpennek a maannong dagiti ordinansa ti templo para kadagiti kapuonanda a natay a di nakaawat kadagitoy. Nasken nga agsubli a masansan dagiti kameng ti Simbaan a nakaawat iti bukodda nga ordinansa iti templo no ipalubos ti panawen, kasasaad, ken pammalubos a maaramat ti templo a mangannong kadagiti ordinansa a para kadagiti kapuonanda.

Nasken a tiponen dagiti amma ken inna dagiti naisurat a pakasaritaan dagiti napateg a pasamak iti biagda ken iti biag dagiti annakda, agraman dagiti sertipiko ti pammendision, panagbuniag, pannakaordena, panag-

kallaysa, ken pannakatay; dagiti napa-pateg a surat; dagiti retrato; dagiti artikulo a nagetteng manipud kadagiti pagiwarnak; ken dadduma pay a maipada a bambanag. Nasken a tiponenda dagiti bukodda a pakasaritaan ken allukoyenda ti tunggal kameng ti kaamaan a mangitalimeng iti bukodda a pakasaritaan. Nasken a tulonganda dagiti in-inaudi nga annak a

mangirugi kadagiti bukodda a pakasaritaan.

Nasken nga ummongen dagiti kaamaan ti pakaammo maipapan kadagiti kapuonanda ken tiponenda daytoy a kas pakasaritaan ti kaamaan. Nasken nga irugida babaen ti panangtiponda kadagiti pakaammo iti kaudian nga uppat a kaputotanda.

Panagsanay iti Panangidaulo



Babaen ti panangiturong dagiti dadaulo ti mision, distrito, wenno istaka,

nasken nga isuro dagiti dadaulo ti korum ken ragup ti kinasaserdote ti tunggal ama nga imatonanda tapno maawatan ken ipatungpalda ti tallo a kangrunaan a pagrebbengan ti kinasaserdote iti kaamaanna (kitaen ti panid 15–18). Nasken nga isuro dagiti dadaulo ti kinasaserdote ti tunggal ama no kasano ti mangidaulo iti kaamaanna a kas maysa a yunit ti Simbaan. No saan nga agnanaed ti kaamaan iti sanga wenno purok, nasken a penken dagiti dadaulo ti mision, distrito, wenno istaka a masursuro ken maipatungpal dagiti amma dagiti pagrebbenganda.

Ti Kaamaan a kas maysa a Yunit ti Simbaan



Sumagmamano a kaamaan ti saan a maibilang iti grupo, sanga, wenno purok. *Babaen ti pammalubos manipud iti presidente ti mision, distrito, wenno istaka*, nasken dagita a kaamaan ti mangangay iti serbisio ti panagday-dayaw iti Domingo iti pagtaenganda. No addaan ti ama iti kinasaserdote, maimatmatonan ti kaamaan a kas maysa a yunit ti Simbaan. Mabalín ti ama wenno sabali a dadaulo iti kinasaserdote ti mangisagana ken mangbendision iti sakramento no maikari daytoy, no saserdote daytoy iti Kinasaserdote nga Aaron wenno addaan daytoy iti Kinasaserdote a Melchizedek, *ken addaan daytoy iti pammalubos manipud kadagiti dadaulona*

iti kinasaserdote. Mabalín ti asino man nga addaan iti kinasaserdote ti mangibunong iti sakramento. Adda kadagiti panid 25–27 daytoy a libro a pangiwawan dagiti pangiturong iti panangannong iti sakramento.

Nasken a simple, naraem, ken nada-yaw ti maysa a serbisio ti panagday-dayaw iti Domingo. Mabalín a buklen daytoy ti:

1. Pangrugi a himno
2. Pangrugi a kararag
3. Panangbendision ken panangibunong iti sakramento
4. Maysa wenno ad-adu pay ngem dagiti sumaganad a banag:

- Maysa wenno dua nga ababa a bitla wenno pammaneknek
- Panagbasa ken panaglilinnawag iti nasantuan a kasuratan a kas sa- ngakaamaan
- Maysa nga adalen nga ited ti maysa a kameng ti kaamaan

5. Panggibus a himno

6. Panggibus a kararag

Iti panangplano iti serbisio a pagday- dayaw iti Domingo, nasken a kalika- guman a gun-oden ken suroten ti ama ti pannarabay ti Espiritu ti Apo. Nangted dagiti tao iti Libro ni Mormon iti pagwadan daytoy a kita ti serbisio: “Ket naiturong ti panagmi- mitingda. . .ti wagas a pagayatan ti Espiritu, ken babaen ti pannakabalin ti Espiritu Santo; ta inturong ida ti pannakabalin ti Espiritu Santo a ma- ngasaba, wenno mangigunamgunam, wenno agkararag, wenno agkalika- gum, wenno agkanta, ket kasta ti naa- ramid” (Moroni 6:9).

Nasken nga aramaten ti kaamaan da- giti nasantuan a kasuratan a kas kangrunaan a tarabayda. Mainayon kadagitoy, mabalinda pay nga arama- ten dagiti bitla iti sapaap a kompe- rensia, *Gospel Fundamentals*, *Pagbatayan ti Ebanghelio*, polieto ti mi- sionario, magasin ti Simbaan, ken dadduma pay a pablaak ken audiovi- sual nga ar-aramaten ti Simbaan.

No awan ti addaan iti umisu a kina- saserdote iti kaamaan, mabalin ti ama wenno ti ina a mangummong a sang- kamaysa kadagiti kameng ti kaamaan tapno aggididdanda nga agkanta ka- dagiti himno, agadalda kadagiti na- santuan a kasuratan, agkararagda, ken mayasideg iti tunggal maysa ken iti Nailangitan nga Ama. Ti naduto- kan a dadaulo ti kinasaserdote ti kaa- maan ti mangurnos kadagiti linawas a gundaway tapno umawat ti kaa- maan iti sakramento.

Nasken a maaddaan dagiti nagannak kadagiti aramiden iti maysa nga aldaw iti linawas malaksid iti Domingo, kas iti panaguli iti bantay, panagpiknik, panagbuya kadagiti na- pintas a sine, panangsarungkar kada- giti kabagian, panagay-ayam, panangangay iti programa iti musika, ken panaglangoy.

Ti kaamaan a saan a maibilang iti purok wenno sanga ket nasken a mangted iti apagkapullo ken daton iti panagayuno ken dadduma pay nga abuloy iti naidutok a dadaulo iti kina- saserdote.

Awan ti nakasurat a report nga ipatu- lod dagiti kaamaan iti Simbaan, ngem, no mabalin, nasken a maad- daan ti ama iti bukod a pannakiuman iti kinasaserdote iti naidutok a dadau- lona iti kinasaserdote iti uray tunggal tallo a bulan a pangipadamaganna iti kasasaad ti kaamaanna.

Dagiti Ordinansa ken Bendision ti Kinasaserdote



Sagrado nga aramid dagiti ordinansa ti kinasaserdote nga inted ti Apo ken maannong babaen ti turay ti kinasaserdote. Maited dagiti bendision ti kinasaserdote babaen ti turay ti kinasaserdote para iti panangagas, panangliwliwa, ken panangparegta. Nasken nga isagana dagiti kakabsat a lallaki a mangannong kadagiti ordinansa ken bendision ti bagbagida babaen ti panagbiag a mayannurot kadagiti pagbatayan ti ebanghelio ken agkagumaan a matarabay babaen ti Nasantuan nga Espiritu. Nasken nga annongenda ti tunggal ordinansa ken bendision iti natakneng a wagas ken agtungpalda kadagiti sumaganad nga annuroten; ti ordinansa ket nasken a:

1. Maannong iti nagan ni Jesucristo.

2. Maannong babaen ti turay ti kinasaserdote.

3. Maannong nga addaan kadagiti ania man a kasapulan a wagas, kas iti panangaramat kadagiti nalawag a balikas wenno panangaramat iti naikkan-pateg a lana.

4. Addaan iti pammalubos ti nadutokan a dadaulo ti kinasaserdote nga agiggem kadagiti umno a tulbek, no kasapulan.

Dagiti ordinansa nga agkasapulan iti pammalubos ti dadaulo iti kinasaserdote ket ti panangnagan ken panangbendision kadagiti ubbing, panangannong kadagiti panagbuniag ken panangpatalged, panangitalek iti kinasaserdote ken panagordena iti saad ti kinasaserdote, panangbendision

ken panangibunong iti sakramento, ken panangidaton kadagiti tanem.

Makatulong dagiti ordinansa ken bendision a nailawlawag iti daytoy a benneg kadagiti amma nga agserbi a kas patriarka kadagiti kaamaanda.

Panangnagan ken Panangbendision kadagiti Ubbing



“Idatag ti tunggal kameng ti simbaan ni Cristo dagiti annakda kadagiti elder iti simbaan, a mangipatay kadagiti dakulapda kadakuada iti nagan ni Jesucristo, ket bendisionanda ida iti naganna” (DkK 20:70). Maitunos iti daytoy a paltiing, dagiti laeng maikari a lallaki nga addaan iti Kinasaserdote a Melchizedek ti mabalina a makiraman iti panangnagan ken panangbendision kadagiti ubbing. *Kasapulan ti ordinansa a panangnagan ken panangbendision kadagiti ubbing ti pammalubos manipud iti mangimatmaton nga agrebbeng.*

No bendisionan ti maysa a maladaga, aguummong dagiti lallaki nga ad-

daan iti Kinasaserdote a Melchizedek iti nagtimbukel ken itapayada dagiti imada iti maladaga. No bendision ti ubing a natataengan, ipatay a silalagan dagiti kakabsat a lallaki ti imada iti ulo ti ubing. Ti tao a mangted iti bendision:

1. Awaganna ti Nailangitan nga Ama.
2. Sawenna a maited ti bendision babain ti turay ti Kinasaserdote a Melchizedek.
3. Ikkanna ti ubing iti nagan.
4. Mangted iti bendision ti kinasaserdote kas iturong ti Espiritu.
5. Gibusanna iti nagan ni Jesucristo.

Panagbuniag



Babain ti panangiturong ti mangimatmaton nga agrebbeng, mabalina ti maikari a saserdote wenna lalaki nga addaan iti Kinasaserdote a Melchizedek ti mangannong ti panagbuniag. Tapno maramid daytoy, isu:

1. Agtakder iti danum a kaduana ti tao a mabuniagan.
2. Para iti gin-awa ken talged, iggananna ti kanawan a pungupu-

nguan ti tao babaen ti kanigid nga imana; iggaman ti tao a mabuniagan ti kanigid a pungupunguan ti tao a mangannong iti panagbuniag babaen ti kanigid nga imana.

3. Ingatona ti kanawan a takiagna nga agkuadrado.
4. Sawenna ti sibubukel a nagan ti tao ket kunana, "Babaen ti pannakabalin nga inted ni Jesucristo kaniak, buniaganka iti nagan ti Ama, ken ti Anak, ken ti Espiritu Santo. Amen" (DkK 20:73)."
5. Paapputna ti agong ti tao babaen ti kanawan nga imana para iti panna-kagin-awa; ikabil ti tao a mangannong iti panagbuniag ti kanawan a dakulapna iti bukot ti tao ket iraremna a naan-anay ti tao, agraman ti pagan-anay ti tao.
6. Tulonganna ti tao a lumung-aw manipud iti danum.

Saksian ti dua a saserdote wenna lallaki nga addaan iti Kinasaserdote a Melchizedek ti tunggal panagbuniag tapno mapennek nga umno ti panna-kaannong daytoy. Nasken a maulit ti panagbuniag no saan nga eksakto a naisao dagiti balikas a kas naited iti Doktrina ken Katulagan 20:73 wenna no saan a nairarem a naan-anay ti bagi wenna pagan-anay ti tao. Masapul nga agaruat iti puraw a kawes a saan nga agsaragasag no mabasa ti tao a mabuniagan ken ti tao a mangannong ti ordinansa.

Panangpatalged



Mapatalgedan dagiti napasurot nga agtawen iti siam wenna natataengan ken dagiti agtawen iti walo nga agpada a saan a kameng dagiti nagan-nakda iti taripong ti sakramento (kitaen ti DkK 20:41). Mabalin a mapatalgedan a dagus dagiti agtawen iti walo nga ubbing kalpasan ti panagbuniagda iti lugar a nagbuniaganda no uray maysa laeng a nagannak ket kameng ti Simbaan ken agpada dagiti nagannak a nangted iti pammalubos para iti panagbuniag ken panangpatalged. *Babaen ti panangiturong ti panguluen ti sanga*, maysa wenna ad-adu a lallaki nga addaan iti Kinasaserdote a Melchizedek ti mabalin a mangannong iti daytoy nga ordinansa. Ipatayda a silalag-an dagiti dakulapda iti ulo ti tao. Ti tao a mangannong iti ordinansa ket:

1. Sawenna ti sibubukel a nagan ti tao.
2. Sawenna a maannong ti ordinansa babaen ti turay ti Kinasaserdote a Melchizedek.

3. Patalgedanna ti tao a kas kameng ti Ti Simbaan ni Jesucristo dagiti Santo iti Ud-udina nga Aldaw.
4. Ipaayna ti sagut ti Espiritu Santo babaen ti panagkunana, "Awatem ti Espiritu Santo."
5. Mangted iti bendision ti kinasaserdote no iturong ti Espiritu.
6. Gibusanna iti nagan ni Jesucristo.

Panangitalek iti Kinasaserdote ken Panangordena kadagiti Saad ti Kinasaserdote



Imatonan ti presidente ti sanga ti panangitalek iti Kinasaserdote nga Aaron ken panangordena kadagiti saad ti diakono, maestro, ken saserdote. Sakbay a maordenan ti maysa a tao iti saad ti Kinasaserdote nga Aaron, nasken a kauman isuna ti presidente ti sanga ken matakuan a maikari. Kasta met a makanunongan isuna iti taripnong ti sakramento ti sanga. Babaen ti

pammalubos ti presidente ti sanga, mabalin nga italek ti maysa a saserdote ti Kinasaserdote nga Aaron iti sabali a tao ken ordenanna isuna iti saad ti Kinasaserdote nga Aaron.

Imatonan ti presidente ti mision ti panakaitalek ti Kinasaserdote a Melchizedek ken ti pannakaordena iti saad nga elder.

Tapno maitalek ti kinasaserdote wenna mangordena iti maysa a tao iti saad ti kinasaserdote, maysa wenna ad-adu pay a lallaki nga agik-ikut iti kasapulan a kinasaserdote ken inikkan-turay ti mangimatmaton nga adaan turay nga ipatay a silalag-an dagiti dakulapda iti ulo ti tao. Ti tao a mangannong ti ordinansa ket:

1. Awaganna ti tao babaen ti sibubukel a naganna.
2. Sawenna ti turay (Kinasaserdote nga Aaron wenna Melchizedek) a pakaannongan ti panagordena.
3. Italekna ti Kinasaserdote nga Aaron wenna Melchizedek, malaksid no naitaleken daytoy iti nasapsapa.
4. Ordenanna ti tao iti saad ti Kinasaserdote nga Aaron wenna Melchizedek ken ipaayna dagiti karbengan, bileg, ken turay dayta a saad.
5. Mangted iti bendision ti kinasaserdote kas iturong ti Espiritu.
6. Gibusanna iti nagan ni Jesucristo.

Sakramento



Sagrado unay nga ordinansa ti sakramento. Ti pannakiranud iti sakramento ti mangted iti gundaway a manglagip iti biag, pannursuro, ken Pannubbot ni Jesucristo. Daytoy ti gundaway a panangpabaro kadagiti katulagan nga inaramid iti Apo iti panawen a panagbuniag (kitaen ti Mosiah 18:8–10).

Mabalin nga isagana dagiti maestro ken saserdote ti sakramento; mabalin a bendisionan daytoy dagiti saserdote; ken dagiti diakono, maestro, ken mabalin nga ibunong dagiti saserdote. Mabalin nga isagana, bendisionan, ken ibunong dagiti kakabsat a lallaki nga addaan iti Kinasaserdote a Melchizedek, ti sakramento ngem gagangay nga aramidenda daytoy no bassit laeng ti adda a kakabsat a lallaki nga addaan iti Kinasaserdote nga Aaron. No nagbasol iti nadagsen ti maysa a tao, nasken a saanna nga isagana, bendisionan, wenna ibunong ti sakramento agingga a di nakapagbabawi ken narisutnan ti banag iti presidentena iti sanga.

An-annongen dagiti mangisagana, mangbendision, wenna mangibunong iti sakramento daytoy nga ordinansa kadagiti dadduma nga agpaay iti Apo. Nasken ti tunggal tao nga agikut iti kinasaserdote a tungpalenna daytoy a naituding nga aramiden nga addaan iti napasnek, naraem nga ugali. Nasken a naurnos iti bagina, nadalus, ken agkawes a sidisente. Nasken nga ipakita ti langa ti kinasagrado ti ordinansa.

Nasken nga aramiden daytoy dagiti kakabsat a lallaki a mangisagana iti sakramento sakbay a mangrugi ti tariptonng. Mangikabilda iti saan pay a naiwa a tinapay kadagiti nadalus a bandeha a pagyanan ti tinapay ken mangikabilda iti babassit a baso ti sakramento iti bandeha a nakargaan iti nadalus a danum iti rabaw ti lamisaan ti sakramento. Abbonganda ti tinapay ken danum iti maysa a nadalus, puraw a lupot.

Bayat ti pannakatokar ti himno ti sakramento, ikkaten dagiti kakabsat a lallaki nga adda iti lamisaan ti sakramento ti lupot a nakaabbong iti bandeha a pagyanan ti tinapay ket pirsapirsayenda ti tinapay iti babassit. Kalpasan ti himno, agparintumeng ti tao a mangbendision iti tinapay ket idatonna ti kararag ti sakramento para iti tinapay. Ibunong ngarud dagiti kakabsat a lallaki ti tinapay kadagiti adda a timmaripnonng iti naraem ken naurnos a wagas. Ti mangimatmaton nga agrebbeng nga adda iti tariptonng ti umuna nga

umawat iti sakramento. No nalpasen a nakiranud iti tinapay ti amin a timmaripnong, isubli dagiti agibumbunong ti bandeha iti lamisaan ti sakramento. Abbongan manen dagiti mangbendision iti sakramento dagiti bandeha kalpasan a naibunong ti tinapay.

Ikkaten dagiti kakabsat a lallaki nga adda iti lamisaan ti sakramento ti lupot a nakaabbong ti bandeha ti danum. Agparintumeng ti tao a mangbendision iti danum ket idatonna ti kararag ti sakramento para iti danum. Kalpasanna ibunong dagiti kakabsat a lallaki ti danum kadagiti adda a timmaripnong. Maisubli dagiti bandeha iti lamisaan ti sakramento ket maabbongan manen. Agtugaw ngarud dagiti kakabsat a lallaki a nangbendision ken nangibunong iti sakramento a kadua ti kongregasion.

Agpaay ti sakramento kadagiti kameng ti Simbaan, agraman kadagiti ubbing. Nasken a saan nga ipakammo ti tao a mangiturturong iti taripnong a maibunong laeng daytoy kadagiti kameng; awan ti nasken a maaramid tapno pawilan dagiti saan a kameng a makiranud iti daytoy.

Nasken a maisao a silalawag, awan biddutna, ken sidadayaw dagiti kararag iti sakramento. No agbiddut ti tao a mangbendision ti sakramento iti pannakaisao ket saanna nga aturen a mismo daytoy, nasken nga idawat ti presidente ti sanga nga ulitenna ti kararag ket sawenna a siuumno.

Ti sumaganad ti kararag iti tinapay:

“O Dios, Agnanayon nga Ama, dawatenmi kenka iti nagan ti Anakmo, ni Jesucristo, a bendisionam ken pasantuem daytoy a tinapay kadagiti kararua dagiti amin a mairanud iti daytoy, tapno lak-amenda a silalagip iti bagi ti Anakmo, ken paneknekanda kenka, O Dios, Agnanayon nga Ama, tapno siaayatda a mangawat iti nagan ti Anakmo, ken kanayon a laglagipenda, ken tungpalenda dagiti bilin nga intedna kadakuada; tapno kanayon nga agtaeng kadakuada ti Espirituna. Amen” (DkK 20:77 ken Moroni 4).

Ti sumaganad ti kararag iti danum:

“O, Dios, Agnanayon nga Ama, dawatenmi kenka, iti nagan ti Anakmo, ni Jesucristo, a bendisionan ken pasantuem daytoy a danum kadagiti kararua dagiti amin nga uminum iti daytoy, tapno aramidenda a silalagip iti dara ti Anakmo, a nagsayasay gapu kadakuada; tapno paneknekanda kenka, O Dios, Agnanayon nga Ama, tapno kanayon a laglagipenda, tapno agtaeng kadakuada ti Espirituna. Amen” (DkK 20:79 ken Moroni 5).

Nasken a maikkat a dagus ti sakramento manipud iti lamisaan apaman a malpas ti miting. Maaramat a tararon ti ania man a nabati a tinapay.

Kasapulan ti panangbendision ken panangibunong iti sakramento ti pammalubos manipud iti mangimatmaton nga agrebbeng.

Panangted-pateg iti Lana

Maysa a lalaki (wenno ad-adu pay) nga addaan iti Kinasaserdote a Melchizedek ti mangted-pateg iti puro a lana ti olibo para iti nasantuan a pakaaramatanna a pangpulot kadagiti masakit wenno agsagsagaba. Isu a mangted-pateg iti lana:

1. Iggamanna ti nakalukat a pagikkan iti lana ti olibo.
2. Awaganna ti Nailangitan nga Amatayo.
3. Sawenna nga agak-akem isuna babaen ti turay ti Kinasaserdote a Melchizedek.
4. Ikkang-pategna ti lana (saan a ti pagikkan) ken pasingkedanna daytoy a pangpulot kadagiti masakit ken agsagsagaba.
5. Gibusanna iti nagan ni Jesucristo.

Panangnong kadagiti Masakit

Dagiti laeng lalaki nga addaan iti Kinasaserdote a Melchizedek ti mabalina a mangnong kadagiti masakit wenno agsagsagaba. Gagangay a dua wenno ad-adu pay ti mangnong a sangkamaysa, ngem mabalina nga aramiden ti tao nga is-isuna laeng. No awan ti naikkan-pateg a lana, mabalina ti lalaki nga addaan iti Kinasaserdote a Melchizedek ti mangted iti pamendisyon babaen ti turay ti kinasaserdote.

Nasken a mangnong kadagiti masakit a kameng ti kaamaanna ti ama



nga addaan iti Kinasaserdote a Melchizedek. Mabalina a kiddawen iti sabali a lalaki nga addaan iti Kinasaserdote a Melchizedek a tumulong kenkuana.

Addaan iti dua a paset ti panangnong iti masakit: (1) panangpulot iti lana ken (2) panangpasingked iti pangpulot.

Panangpulot iti Lana

Pulotan ti lalaki nga addaan iti Kinasaserdote a Melchizedek ti tao a masakit. Tapno maaramid daytoy, isu:

1. Patedtedanna iti naikkan-pateg a lana iti ulo ti tao (a masakit).
2. Ipatayna a silalag-an dagiti dakulapna iti ulo ti tao ken awaganna ti tao babaen ti sibubukel a naganna.
3. Sawenna a pulotanna ti tao babaen ti turay ti Kinasaserdote a Melchizedek.
4. Sawenna a pulotanna iti lana a naikkan-pateg para iti pangpaimbag iti masakit.
5. Gibusanna iti nagan ni Jesucristo.

Panangpasingked iti Panangpulot

Gagangay a dua wenno ad-adu a lalaki nga addaan iti Kinasaserdote a Melchizedek ti mangipatay a silalagan kadagiti dakulapda iti ulo ti tao a masakit. Maysa kadagiti lalaki ti mangpasingked iti panangpulot. Tapno maaramid daytoy, isu:

1. Awaganna ti tao babaen ti sibubukel a naganna.
2. Sawenna a pasingkedanna ti panangpulot babaen ti turay ti Kinasaserdote a Melchizedek.
3. Mangted iti bendision kas iturong ti Espiritu.
4. Gibusanna iti nagan ni Jesucristo.

Dagiti Bendision ti Ama ken Dadduma pay a Bendision a Pangliwliwa ken Pammagbaga



Naited dagiti bendision ti ama ken dadduma pay a bendision tapno mangted iti pangiturong ken pangliwliwa babaen ti panangiturong ti Espiritu.

Mabalin ti maysa nga ama nga addaan iti Kinasaserdote a Melchizedek ti mangted kadagiti bendision ti ama kadagiti annakna. Mabalin a maipangpangruna a makatulong dagita a bendision no umadayo dagiti annak iti pagtaengan kas iti papanda iti pagadalan, wenno mapanda agmision, wenno mangrugida nga agrabaho, agkallaysada, sumrekda iti serbisio militar, wenno maipasangoda kadagiti bukod a karkarna a pannubok. Mabalin a naindaklan a pigsa dagitoy a bendision iti kaamaan. Mabalin nga isurat ti kaamaan ti bendision ti ama para kadagiti kasuratan ti kaamaan, ngem saan a mataginayon daytoy kadagiti kasuratan ti Simbaan. Nasken nga allukoyen dagiti nagannak dagiti annak nga agdawat kadagiti bendision ti ama kadagiti panawen a panagkasapulan.

Mabalin pay dagiti maikari a lalaki nga addaan iti Kinasaserdote a Melchizedek ti mangted kadagiti bendision a pangliwliwa ken pammagbaga kadagiti assawada, kakabagianda a kameng ti kaamaan, ken dadduma pay nga agkiddaw kadakuada.

Tapno mangted iti bendision ti ama wenno dadduma pay a bendision a pangliwliwa ken pammagbaga, ipatay a silalagan ti maysa a lalaki nga agikut iti Kinasaserdote a Melchizedek, agmaymaysa man wenno ad-adu pay a maikari a lalaki nga agikut iti Kinasaserdote a Melchizedek dagiti dakulapda iti ulo ti tao nga umawat iti bendision.

Awan ti kasapulan a lana iti kasta a pammendision. Ti tao a mangted iti bendision:

1. Awaganna ti tao babaen ti sibubukel a naganna.
2. Sawenna a mangmangted isuna iti bendision babaen ti turay ti Kinasaserdote a Melchizedek.
3. Mangted iti bendision kas iturong ti Espiritu.
4. Gibusanna iti nagan ni Jesucristo.

Panangidaton kadagiti Tanem

Nasken nga addaan ti tao a mangidaton iti tanem iti Kinasaserdote a Melchizedek ken *nasken nga inikkan iti pammalubos ti dadaulo ti kinasaserdote a mangiturturong iti serbisio.*

Tapno maidaton ti maysa a tanem, isu:

1. Awaganna ti Nailangitan nga Ama.
 2. Sawenna nga idatonna ti tanem babaen ti turay ti Kinasaserdote a Melchizedek.
 3. Idaton ken ikkan-pategna ti daga a pagitaneman a kas disso a paginaan ti bagi ti pimmusay.
 4. No mayannatup, ikararagna a mapasanto ken masalakniban ti disso agingga iti Panangungar.
 5. Dawatenna iti Apo a liwliwaenna ti kaamaan ken yebkasna ti dadduma pay a kapanunotan kas iturong ti Espiritu.
 6. Gibusanna iti nagan ni Jesucristo.
- No kayakay ti kaamaan, mabalin ti tao (nasaysayaat no lalaki nga addaan iti Kinasaserdote a Melchizedek) ti mangted iti kararag iti pagitaneman imbes a kararag a pangidaton.

Pananggun-od kadagiti Material ti Simbaan ken Panagsapul iti Impormasion iti Pakasaritaan ti Kaamaan

Mabalin a magun-od dagiti lokal a daulo ken dadduma a kameng dagiti material ti Simbaan, agraman dagiti nasantuan a kasuratan, dagiti kurso nga adalen, magasin ti Simbaan, pagan-anay (garments) ken kawes iti templo manipud iti sentro ti pag-iwarwarasan ti Simbaan wenno sentro ti serbisio, manipud iti Salt Lake

Distribution Center, wenno babaen ti opisial nga Internet site ti Simbaan, a masarakan iti www.lds.org.

Sidadaan a magun-od ti impormasion maipapan iti aramid ti pakasaritaan ti kaamaan iti *Internet site* ti pakasari-taan ti kaamaan ti Simbaan, a masara-kan iti www.familysearch.org.

TI SIMBAAN NI
JESUCRISTO
DAGITI SANTO
ITI UD-UDINA NGA ALDAW

